



ზოგადსაგანმანათლებლო
დანესახულებების ავტორიზაციის საბჭო

02/05/2025



MES 9 25 0000474633

გადაწყვეტილება

**ზოგადსაგანმანათლებლო დაწესებულებების ავტორიზაციის საბჭოს 2023 წლის 27 დეკემბრის
N1771665 ოქმის მე-5 ნაწილში ცვლილების შეტანის შესახებ**

ზოგადსაგანმანათლებლო დაწესებულებების ავტორიზაციის საბჭოს სხდომაზე გამოვლენილი გარემოებების შესწავლის, შეფასებისა და ურთიერთშეჯერების შედეგად, საქართველოს ზოგადი ადმინისტრაციული კოდექსის 63-ე მუხლის პირველი პუნქტის საფუძველზე,

საბჭომ გადაწყვიტა:

1. შევიდეს ცვლილება ზოგადსაგანმანათლებლო დაწესებულებების ავტორიზაციის საბჭოს 2023 წლის 27 დეკემბრის N1771665 ოქმის მე-5 ნაწილში და ჩამოყალიბდეს შემდეგნაირად:

„5. სსიპ - ასპინძის მუნიციპალიტეტის სოფელ ორგორის საჯარო სკოლის ავტორიზაციის საკითხის განხილვა

სხდომის თავმჯდომარემ დაწესებულებების წარმომადგენლებს მიმართა, ხომ არ ჰქონდათ საბჭოს წევრების მიმართ აცილება. დაწესებულების წარმომადგენლებმა დაადასტურეს, რომ საბჭოს წევრების მიმართ აცილება არ ჰქონდათ.

სხდომის თავმჯდომარემ, თამარ მამსიკაშვილმა მიმართა საბჭოს წევრებს, დაედასტურებინათ, რომ იცნობდნენ ავტორიზაციის ექსპერტთა ჯგუფის დასკვნას და დაწესებულების მიერ წარმოდგენილ არგუმენტირებულ პოზიციას დასკვნის პროექტთან მიმართებით. საბჭოს

წევრებმა დაადასტურეს, რომ იცნობდნენ საქმის მასალებს. სხდომის თავმჯდომარემ ჰკითხა დაინტერესებული მხარის წარმომადგენელს იცნობდა თუ არა ავტორიზაციის ექსპერტთა ჯგუფის დასკვნას. წარმომადგენელმა დაადასტურა, რომ იცნობდა დასკვნას. შესაბამისად, სხდომის თავმჯდომარემ საბჭოს მდივანს სთხოვა, რომ ექსპერტთა ჯგუფის დასკვნა დაერთო ოქმისთვის, როგორც მისი განუყოფელი ნაწილი.

ექსპერტთა ჯგუფის დასკვნა სხდომაზე წარადგინა ზოგადი განათლების ხარისხის უზრუნველყოფის ექსპერტმა, ნოდარ ანგურიძემ. ექსპერტმა განაცხადა, რომ სსიპ - ასპინძის მუნიციპალიტეტის სოფელ ორგორის საჯარო სკოლაში საავტორიზაციო ვიზიტი განხორციელდა 2023 წლის 11 და 12 ოქტომბერს. სკოლა მდებარეობდა ასპინძის მუნიციპალიტეტში, სოფელ ორგორაში. სკოლა ახორციელებდა ზოგადი განათლების დაწყებითი და საბაზო საფეხურების ზოგადსაგანმანათლებლო პროგრამებს, ქართულ ენაზე. სკოლას თვითშეფასების კითხვარში მოსწავლეთა ზღვრულ რაოდენობად მოთხოვნილი ჰქონდა 40 მოსწავლე. ექსპერტმა აღნიშნა, რომ ვიზიტის დროს სკოლაში ირიცხებოდა 35 მოსწავლე.

ექსპერტმა განაცხადა, რომ პირველი და მეოთხე სტანდარტები შეფასდა, როგორც „შეესაბამება სტანდარტის მოთხოვნებს“. მეორე სტანდარტი დაწყებით საფეხურზე შეფასდა, როგორც „შეესაბამება სტანდარტის მოთხოვნებს“, ხოლო საბაზო საფეხურზე შეფასდა, როგორც „მეტწილად შეესაბამება სტანდარტის მოთხოვნებს“. მესამე სტანდარტი შეფასდა, როგორც „მეტწილად შეესაბამება სტანდარტის მოთხოვნებს“. სტანდარტის მოთხოვნებთან ასევე „მეტწილად“ შესაბამისი იყო კომპონენტები 1.2, 3.1 და 3.4.

ექსპერტმა, ნოდარ ანგურიძემ აღნიშნა, რომ თითოეულ ინდიკატორთან დაკავშირებით, რომელიც შეფასდა „მეტწილად“, ექსპერტთა ჯგუფის მიერ გაცემული იყო რეკომენდაციები, რომლებიც აღწერილი იყო ზოგადსაგანმანათლებლო დაწესებულების სტატუსის მაძიებლის შესახებ ზოგადსაგანმანათლებლო დაწესებულების ექსპერტთა ჯგუფის დასკვნაში. დასკვნა ასევე მოიცავდა ექსპერტთა ჯგუფის მიერ გაცემულ რჩევებს.

ექსპერტმა, ნოდარ ანგურიძემ აღნიშნა, რომ სკოლაში წლების წინ გაჩენილმა ხანძარმა გაანადგურა სკოლის მდიდარი ბიბლიოთეკა და საბუნებისმეტყველო ლაბორატორია. ექსპერტის განცხადებით, დაწესებულებაში სარეაბილიტაციო სამუშაოების განხორციელებამდე სასწავლო პროცესები მიმდინარეობდა მეზობელ სოფელში მდებარე სკოლაში.

სხდომის თავმჯდომარემ, თამარ მამსიკაშვილმა ექსპერტს მიმართა კითხვით, რომელ წელს იყო სკოლაში განხორციელებული სარეაბილიტაციო სამუშაოები. ექსპერტმა, ნოდარ ანგურიძემ განმარტა, რომ სკოლაში სარეაბილიტაციო სამუშაოები ჩატარდა 2021-2022 სასწავლო წელს.

საბჭოს წევრმა, პეტრე ბაბილუამ აღნიშნა, რომ სკოლის მიერ წარმოდგენილი კურიკულუმები რიგ შემთხვევებში არ იყო სრულყოფილი და ამასთანავე, კურიკულუმების სტილი ძალიან განსხვავდებოდა ერთმანეთისგან, რაც არ ტოვებდა სკოლაში შეთანხმებული და გუნდური მუშაობის შთაბეჭდილებას. საბჭოს წევრმა ექსპერტებს მიმართა კითხვით, ჰქონდა თუ არა სკოლაში ადგილი თანამშრომლობას, იდეების გაზიარებასა და შეთანხმებას. სახელმწიფო ენის საგნობრივმა ექსპერტმა, როლანდ ხოჯანაშვილმა აღნიშნა, რომ მიუხედავად კურიკულუმების ჩარჩოებს შორის დიდი სხვაობისა, სკოლაში მასწავლებლებს შორის არსებობდა მაღალი თანამშრომლობითი კულტურა, ისინი ატარებდნენ ინტეგრირებულ გაკვეთილებს, ახორციელებდნენ ერთობლივ პროექტებს.

საბჭოს წევრმა, ქეთევან ნატროშვილმა სკოლის წარმომადგენელს მიმართა კითხვით, სკოლის ლაბორატორიით უზრუნველყოფის მიზნით, ჰქონდა თუ არა დაწესებულებას ქმედითი ნაბიჯები გადადგმული მოცემული დროისთვის. სკოლის დირექტორის მოვალეობის შემსრულებელმა, ნელი ნათენაძემ აღნიშნა, რომ მიმდინარე პერიოდში სკოლის ბიუჯეტიდან შეძენილი იყო ლაბორატორიისთვის ამწოვი კარადა და ხელსაბანი. სკოლის დირექტორის მოვალეობის შემსრულებელმა აღნიშნა, რომ დაწესებულება ეტაპობრივად გეგმავდა ლაბორატორიისთვის საჭირო რესურსების შეძენას. საბუნებისმეტყველო მეცნიერებების საგნობრივმა ექსპერტმა, ირინა გოგონაიამ აღნიშნა, რომ სკოლაში საბუნებისმეტყველო მეცნიერებების მასწავლებლები აქტიურად და ნაყოფიერად თანამშრომლობდნენ. სკოლას

STEM-ის კონფერენციაზე წარმოდგენილი ჰქონდა ინტეგრირებული პროექტი, სახელწოდებით „ჩემი სკოლის საოცნებო პარკი“.

სხდომის თავმჯდომარემ თამარ მამსიკაშვილმა მიმართა საბჭოს წევრებს, ხომ არ ჰქონდათ შეკითხვები სკოლის წარმომადგენლებთან ან ექსპერტებთან.

საბჭოს წევრებს შეკითხვები არ ჰქონდათ.

სხდომის თავმჯდომარემ კენჭისყრაზე დააყენა სსიპ - ასპინძის მუნიციპალიტეტის სოფელ ორგორის საჯარო სკოლის ავტორიზაციისა და მოსწავლეთა ადგილების ზღვრული რაოდენობის 40-ით განსაზღვრის საკითხი.

კენჭისყრის შედეგები:

მომხრე - 11

წინააღმდეგი - 0

გადაწყვეტილება:

„განათლების ხარისხის განვითარების შესახებ“ საქართველოს კანონის მე-11 მუხლის მე-2 პუნქტის „ა“ ქვეპუნქტის, მე-12 მუხლის, საქართველოს განათლებისა და მეცნიერების მინისტრის 2010 წლის 1 ოქტომბრის N99/ნ ბრძანებით დამტკიცებული „საგანმანათლებლო დაწესებულებების ავტორიზაციის დებულების“ მე-20 მუხლის პირველი პუნქტის „ა“ ქვეპუნქტის და 21-ე მუხლის პირველი, მე-2 და მე-3 პუნქტების, 27- ე მუხლის მე- 4 პუნქტის შესაბამისად, სსიპ - ასპინძის მუნიციპალიტეტის სოფელ ორგორის საჯარო სკოლას (ს/კ : 223104432) 9 წლის ვადით მიენიჭოს ზოგადსაგანმანათლებლო დაწესებულების სტატუსი და მოსწავლეთა ადგილების ზღვრული რაოდენობა განესაზღვროს 40- ით. დაწესებულებას მიენიჭოს უფლებამოსილება განახორციელოს შემდეგი ზოგადსაგანმანათლებლო პროგრამები:

N	ზოგადსაგანმანათლებლო პროგრამის სახელწოდება	ზოგადსაგანმანათლებლო პროგრამის საფეხური	ზოგადსაგანმანათლებლო პროგრამის განხორციელების ენა	ზოგადსაგანმანათლებლო პროგრამის განხორციელების ადგილი (მუნიციპალიტეტის, ქალაქის, დაბის/სოფლის და ქუჩის მითითებით)
1	ზოგადი განათლების დაწყებითი საფეხურის ზოგადსაგანმანათლებლო პროგრამა	დაწყებითი	ქართული	ასპინძის მუნიციპალიტეტი, სოფელი ორგორა
2	ზოგადი განათლების საბაზო საფეხურის ზოგადსაგანმანათლებლო პროგრამა	საბაზო	ქართული	ასპინძის მუნიციპალიტეტი, სოფელი ორგორა

საბჭომ შუამდგომლობით მიმართა ცენტრს დაწესებულებაში მონიტორინგის განხორციელებასთან დაკავშირებით:

მონიტორინგის დაწყების პერიოდი: 2025 წლის დეკემბრიდან;

მონიტორინგის განხორციელების ფორმა: ადგილზე ვიზიტი;

მონიტორინგის ფარგლები: პირველი, მეორე (დაწყებითი და საბაზო საფეხურების ზოგადსაგანმანათლებლო პროგრამები) და მეოთხე სტანდარტები.

საბჭომ 3.4 კომპონენტის შეფასების გათვალისწინებით, ზოგადსაგანმანათლებლო დაწესებულებას განუსაზღვრა რეკომენდაციები და რეკომენდაციების შესრულების პროგრესის

შესახებ ცენტრის ინფორმირების ვალდებულება 2027 წლის აპრილში, კერძოდ: სახანძრო უსაფრთხოების მოთხოვნებთან შესაბამისობის შესახებ დასკვნისა და შენობა-ნაგებობის მდგრადობის შესახებ დასკვნის მოპოვება და ცენტრში წარდგენა; ასევე, სკოლის შიდა პერიმეტრის ვიდეოსათვალთვალო სისტემით აღჭურვა და დამადასტურებელი დოკუმენტის ცენტრში წარდგენა.“

2. ზოგადსაგანმანათლებლო დაწესებულებების ავტორიზაციის საბჭოს 2025 წლის 02 მაისის N471854 სხდომის ოქმის მეექვსე ნაწილი ცნობილ იქნას ამ გადაწყვეტილების განუყოფელ ნაწილად.

3. ზოგადსაგანმანათლებლო დაწესებულებების ავტორიზაციის საბჭოს გადაწყვეტილების გასაჩივრება შესაძლებელია კანონმდებლობით დადგენილი წესით და ვადაში, სააპელაციო საჩივრის სააპელაციო საბჭოში წარდგენის გზით (შემდეგ მისამართზე: ქ. თბილისი, მ. ალექსიძის ქ. მეორე შესახვევი №2) ან ქ. თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით (შემდეგ მისამართზე: დავით აღმაშენებლის ხეივანი, N64).

სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
საბჭოს მდივანი
ბერიკაშვილი ნინო



სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
საბჭოს თავმჯდომარე
წიფურია ეკატერინე

